

La mendranzes se aur a la solidarietà

Tel chèder de la razionalisazion de sia strutures, la Provinzia de Trent à metù sù n.nef Servije "Mendranzes linguistiches e solidarietà"



Da man dreta: I dirigent Marco Viola, I president de la PAT Lorenzo Dellai, I conseier Luigi Chiocchetti e I president del C11 Leonardo Bernard a la Conferenza de la Mendranzes.

Mendranzes 1 - En vender passà la Jonta de la Provinzia autonoma de Trent à aproà na delibera (nr 1446) proponeta dal president Lorenzo Dellai che, tel chèder de la reorganisazion e razionalisazion de la strutures de la Provinzia, met sù con l prum de messèl che vegn l nef Servije "Mendranzes linguistiches e solidarietà".

L'obietif de chest provediment, apede se sà ben a chel de resoner ai besegnes de razionalisazion e

organisazion interna del personal, l'è descheche se pel lejer te la medema delibera chel de meter ensema la competenzes che vèrda al respet per la comunanzes linguistiches locales con l respet per altra picola comunanzes manco fortunèdes e stravardèdes te dut l mond, per rebadir l fort empegn istituzionèl de la Jonta ti confront de pòpoi, comunanzes e cultures en perìcol o en dificoltà, e en generèl l'atenzion per i valores de duc chi che vegn

conscidré "mendres" o "desferenc".

L nef Servije fèsc pèrt del Departiment Istruzion vidà dal dirigent generèl Carlo Basani, e la strutura te sia atività farà referiment a l'assessora Lia Beltrami per chel che vèrda la solidarietà, enveze per chel che vèrda la mendranzes linguistiches l referent restarà semper l president Lorenzo Dellai.

En cont de chesta neva l'è stat fat interpretaziions e letures desferentes: se defat da na man zachei l'à veduda desche na dezizion negativa per la mendranzes, ajache la tol demez la "spezifizità" del servije (v. posizion de l'Ofize de presidenza de la UAL sun chesta piata), etres l'à veduda enveze desche n segn che la mendranzes se aur, les vegn fora da na sort de "isolament autoreferenzièl" per vardèr a la defendura de la cultures e de la desvalivanzes ence sorafora a si confins.

N troi che perauter l'era jà stat mingol envià via, con projec desche chel de l'adozion linguistica portà inant dal Servije Mendranzes e dal Comprenjorie Ladin anter la Val de Fascia e i Achuar de la foresta amazonica. (lg)